

# 2 Tesalonike

---

## Mepai den.

**1** <sup>1</sup>O galalupne, ye amâ Tesalonike kepien gâtne Anutu Ewenenjannde oloŋ yekto biwiyenŋe Humonenŋe Yesu Kristogât kali. Yengât kulem esenŋe ire kulemgoân. Nâmâ Paulo akto galalogâtne Sila akto Timoteo tân nugumbela kulem esenŋe ire kulemgoen. <sup>2</sup>Akto yengât Anutu Ewenenŋe akto nanŋe Humonenŋe are olop ye okot âlep akyengim damunyeŋe akbela biwiyenŋe sândugeâk.

<sup>3</sup>O Galalupne, nen âmâ yengât nâŋgâm Anutu âlepŋe dâm hokboâk hokboâk mepaiŋe memaen. Akto nenŋe ye biwiyenŋe Yesugâlânâk katbiâ kindo manbiâ sambelemap akto okot âlep agaŋgim gambiâ dondâ miawaktâp. Aregât pat nâŋgâm Anutuŋe wan akyengiep aregât âlepŋe dâm mepaimŋe mendenŋe ârândân akmap. <sup>4</sup>Aregât luâk âmbâle bikŋe yânjannde gasa akyengimai akto umatŋe miawak yengimbo hanâk dâm Yesugât launŋe lokom âlepŋe manmai aregât den pat nâŋgâm Anutugât kâmot kepiaŋe kepiaŋe manmai are yengât pat are makyengimaen.

## Anutugât hâuŋaet den.

<sup>5</sup>Akto umatŋe ya miawak yengiep aregât keiŋe hin. Anutuŋe agak meme âlepŋaet potat nenekmap aregât agak meme are ye hekat yengiwerâm makto umatŋe miawagep. Akto Anutuŋe, “Nâŋgât kâmot Tesalonike kepien manmai are siân manman âlepŋân manbai.” dâm makto umatŋe miawakto hâk hilâlâm nâŋgâm hanâk lokom manbiâ aregât hâuŋe Anutuŋe yengim damunyeŋe akbiâp. <sup>6</sup>Aregât Anutuŋe wan me wan mendo ârândân akmap arekŋe siân luâkŋe umatŋe yengimai are hainâk umatŋe yâk yengimbo ârândân akbiâp. <sup>7</sup>Akto areâk bo. Ye umatŋe lokomai nen olop biwinenŋe sândugeâkgât Anutuŋe siân menenekto manman âlepŋân manbaen. Akto sop aregât keiŋe makyengire nâŋgâŋet. Sop bâiŋe Humonenŋe Yesu are lâuwâŋe huŋgun aŋdo himbimânba gem aŋelo kârikŋe olop kâlâp panmâ gewai. <sup>8</sup>Luâk Anutu bo nâŋgaŋmai akto Humonenŋe Yesugât den pat âlepŋe are nâŋgâm bo lokomai are âmâ hâuŋe umatŋe hamepŋe olowâk

yeŋgiwiap. <sup>9</sup>Humonenŋande ikiŋe enemŋanba akto ikiŋe pagaleŋe kârikŋanba watyekto kâlâp bo bokbiap ain gem âmâ hâk hilâlâm humo nâŋgâm âgâmbiâ bâli bâli kârikŋe miawakyeŋgiwiap. <sup>10</sup>Akto sop ain Humonenŋaet kâmotlupŋe nengâlân pagaleŋe akto egâliŋ gogâlean miawak nengiwiap are bunŋe miawagâkgât Yesuŋe togowiap ain nengâlân pagaleŋe mem agat agatŋe mem agatbiap. Akto nenŋe den pat makyenŋienŋe biwiyenŋe Yesugâlân kali aregât yâk togowiawân meyekbiap. Sop ain nen akto ye olop biwinenŋe Yesugâlân kalion nenŋe Humonenŋe ektenŋe dâtŋe akto kotŋe mem agatmâ manmâ âgâwaen. <sup>11</sup>Are âlepŋe akmâ kârikŋe agâkgât Anutu hokboâk hokboâk ulilaŋmaen. Anutunenŋe damunnenŋe akmap yâkŋe yeŋgonlep are wan me wan makmâ hâreyi are bunŋe agâkgât meme akyenŋimbo wan me wan magi are bunŋe miawakto biwiyenŋe Yesugâlân kali are mem metem âmâ âi humo membai. <sup>12</sup>Hain akbiâ âmâ Anutunenŋe akto Humonenŋe Yesu Kristo yetŋe damunyeŋe akmâ okot âlep akyenŋimbela luâk âmbâle yânŋande yekmâ Yesu Humonenŋaet kotŋe mem agatmâ âmâ agak meme âlepŋe akbiâ ârandânŋ agâk hain dâm ulilaŋmaen.

#### Mitigât gasa kautŋe miawakbiapgât den.

**2** <sup>1</sup>O Galalupne, Yesu Kristo Humonenŋe Anutuŋe lâuwânŋe huŋgun aŋdo gewiap aregât akto nenŋe menduguakmâ peniaŋbaengât keiŋe makyenŋire nâŋgâŋet. <sup>2</sup>Luâk bikŋande, “Bâin. Humonenŋe togowiap aregât sopŋe tâlâguâp.” dâm yeŋgât, “Paulomaŋe kulem esenŋe ire kulemgombiâ mem togoen.” dâm heyenŋimbiâ âmâ den are dowâk bo nâŋgâm biwiyenŋân sân sân bo akto âmâ den aregât bo nâŋgâwai. <sup>3</sup>Akto luâk âmbâle hiaŋgi den makmâ hain dâmbiâ bo nâŋgâwei. Hin nâŋgâwei. Humonenŋe togowerâamboân âmâ sop ainâk âmâ ulik gulik amâ luâk âmbâle dondâ Anutugât hâkâŋ akmai hutyeŋân gâtŋe siâ miawakmâ luâk den koko den kârikŋe hamiŋmâ panbiap are wan me wan âlepŋe are gasa aganmâ hami anmâ âmâ Anutuŋe bâleŋân manbiap dâep yâkŋe soŋ miawakto sop humo tâlâguwiap. <sup>4</sup>Akto luâk âmbâle hânŋe hânŋe manmai arekŋe wan me wan kotyeŋe mem agatmai are yeŋgât dumyeŋân kinmâ âgâwiap. Hain akmâ wan me wan hârok nâŋgâmbiâ gembo nâŋgât nâŋgâmbiâ âgâk dâm wârakbiap. Dâ areâk bo. Luâk âmbâle hârok humoyeŋe akberâm nâŋgât kotne mem agatŋet dâm Anutugât sumbe emetŋân kinmâ nâ Anutu dâm tâwâim kinmâ âgâwiap. <sup>5</sup>Dâ den ire âmâ pup pup bo nâŋgâi. Nâ yeŋgâlân manmâ aregât keiŋe makyenŋiân are nelâm yeŋgiâp mon? <sup>6</sup>Dâ hinŋe âmâ wan me wan siâŋe luâk are mendo bo miawagep aregât keiŋe nâŋgâmai. Akto luâk bâleŋe meme hinŋe bo miawakto âmâ sop bâiŋe tâlâgumboân âmâ miawakbiap. <sup>7</sup>Ire âmâ emelâk den koko luâk bâleŋande tigân âiŋe memap. Akto horat kalaŋmap yâkŋe tâgân hikom mendâp. Dâ irawot

akto hulaŋ akto den koko luâk are tekteknân miawakbiap. <sup>8</sup>Den koko luâk are tekteknân miawakto âmâ Humo Yesuŋe lau biwiŋaet heakŋande den koko luâk are hâkokombo gewiap. Gembo ain âmâ Humo Yesu togowiapgât pagaleŋande erâm itiŋ gulam mendo bo akbiap. <sup>9</sup>Den koko luâk are yâkgât togo togogât keiŋe hin. Yâk âmâ Niambiŋe meme agaŋdo kârikŋe siâ me siâ keiŋe keiŋe olop miawaganmâ hianŋimân kulem akto siâ me siâ dewunnenŋande bo ekmaen are membiap. <sup>10</sup>Akto den koko luâk togowiawân âmâ luâk bikŋe den bunŋaet keiŋe nânŋâm heŋgemgom hâkâŋe dâm heŋgemgo nenekbiapgât dâp tâpâkom mesokmâ âmâ bâleŋaet pat akbai. Hain akbiâ âmâ den koko luâkgât togo togogât keiŋe mem miawakbiap. <sup>11</sup>Luâk bikŋe hain akmaigât Anutuŋe hianŋigât memene akto kautyene gulip agâkgât kârikŋe makto miawakto hianŋi are nânŋâm bunŋe dâm nânŋâm pâpkowai. Hain. <sup>12</sup>Akto areâk bo. Den bunŋaet kautŋe âmâ hâkâŋe dâm siâ me siâ bâleŋaet ukenŋe akmai luâk are yâk yeŋgâlân aregât hâuŋe togo yeŋgiâkgât hain are akbiap.

<sup>13</sup>Galalupne, ye amâ hain bo akbai. Anutuŋe ulikŋân dondâ okot âlep akyeŋgim kepilâm yekmâ ikiŋe Heakŋe huŋgun aŋdo kaut yeŋân mendo den pat âlepŋe nânŋâm agak meme âlepŋe akbai are nânŋâm heŋgemgoep. <sup>14</sup>Anutuŋe hain nânŋâep aregât Tesalonike gâtŋe bikŋe Humonenŋe Yesu Kristogât pagaleŋân manbai dâm huŋgun nengimbo den pat âlepŋe makyenŋienŋe dowâk nânŋâyi aregât Anutu mepaimŋe mem okot âlep nânŋâm kotŋe mem agatenŋe ârândân akbiâp. <sup>15</sup>Aregât den pat âlepŋe makyenŋiyion me kulem esenŋân kulemgoenŋe nânŋâyi are kârikŋe lokom manmâ âgâwei.

<sup>16</sup>Kembunenŋe Yesu Kristo akto Ewenenŋe Anutu yâkŋe han kalem aknengim damunnenŋe akmandat arekŋe biwinenŋe bâliwopgât wât nengimbela tatmâ âgâwaen akto himbimân wan me wan âlepŋe aknengiwiapgât keiŋe maknengimbela biwinenŋe sândugemap. <sup>17</sup>Anutu hain arekŋe hinŋe gai meme akyeŋgimbo kambiamyene humo agâk. Akto âi kârikŋe âlepŋe ketugum den âlepŋeâk makbiâ Anutuŋe yekto huraguâk.

### Pauloŋe Anutuŋe tânnenguâk dâm makyenŋiep.

**3** <sup>1</sup>O Galalupne, den bânŋe hin makyenŋire nânŋâŋet. Yeŋe Anutu nengât ulilaŋbiâ Humonenŋe tân nengumbo âmâ benŋe ulikŋân den makyenŋienŋe ye nânŋâyi are hainâk kepiŋe kepiŋe arim makyenŋienŋe dondâŋe nânŋâwai. Nânŋâm amâ dondâŋe biwiyeŋe Yesugâlân katbiâ Humonenŋaet den are dowâk sambelem humo akbiâp. <sup>2</sup>Akto nen arienŋe luâk âmbâle hânŋe hânŋe manmai dondâŋe âmâ biwiyeŋe Yesugâlân bo kali aregât luâk bikŋe han hioŋ bauŋ bâleŋe maleŋe akmai arekŋe menekberâmbiân âmâ Anutuŋe bâtyeŋânba mem kotgâ nenegâkgât Anutu ulilaŋbei. <sup>3</sup>Akto Humonenŋande âmâ wan

me wan dâm hârem are miawakmap arekne Bâleŋe Amboŋe arekne meyekbop dâm kondo gembo tânyenŋuwiapgât bo pâp komap aregât Anutu hain akbiapgât nânŋâmaen. <sup>4</sup> Akto ye den makyenŋienne lokom manmâ ariwai aregât Kembugât akmâ yengât han lâuwâ bo akmaen. <sup>5</sup> Aregât galama yengât hin dâm Anutu ulilanbe. Amâ Humonenŋande Anutu ye okot âlep akyenŋimap are akto Kristoŋe kârikne kinmâ umatŋe lokom tân nengumap are hekat yenŋimenâ nânŋâwai hain dâm ulilanđân.

### Konam bo manbaengât magep.

<sup>6</sup> O Galalupne, Humonenŋe Yesu Kristoŋe makniŋdo den dâtŋe umatŋe ire makyenŋienne nânŋâŋet. Yengâlân gâtŋe siâŋe konam manmâ âi bo memai. Are den makyenŋiyion are bo lokomai luâk are olop bo manbei. <sup>7</sup> Akto nenŋe yengât hutyenân manmâ nenŋe dâp keiŋe katmâ âiâk memâk memâk malion are ekmâ nânŋâyi. <sup>8</sup> Akto nenŋe sot hâu bâlâk yân bo mem neyion wan me wan nengimbiâ hâk hilâlâm yenŋiwâen dâm hândâk hilâm âi wan me wan ketugum yenŋienne siâŋe puli nengimbiâ are mem sot hâuŋe aregât yengiminiyion. <sup>9</sup> Akto nen hain bo agion dâine ârândân akbop. Akto Anutuŋe sot hâuŋe bo yenŋiwei dâm bo makmâ hâre nengiep. Bo. Nen âmâ yeŋe nenekmâ hain akŋetgât sot hâuŋe yengiminiyion. <sup>10</sup> Akto yengâlai manmâ den hin dâm makyenŋiyion, “Luâk âmbâle bikŋe konam akbiâ âmâ sot are bo yenŋiwei.” dâm makyenŋiyion. <sup>11</sup> Gârâmâ hinŋe yengâlaiwa den hin togombo nânŋâyion. Luâk âmbâle bikŋande konam akmâ siâgât âi bâleŋe mânŋim âiyenŋe hepunmâ yân mandâi dâmbiâ nânŋâyion. <sup>12</sup> Luâk âmbâle hainare yengât âmâ Humonenŋe Yesu Kristogât den sami hin dâm makyenŋienne nânŋâm heŋgemgowai, “Ye âlepŋe heŋgemgom âiyenŋe yeŋeak âi mem sot mem nembai. Dâ yân âmâ bo tatbei.” <sup>13</sup> Akto ye hârok hin makyenŋire agak meme âlepŋe are hokboâk hokboâk akmâ manmâ âgâwei. Akto bo hâkân akbei. <sup>14</sup> Den kulem esenŋe ire kulemgoân ire luâk âmbâle siâŋe hâkân akmâ hepundo âmâ yengâlânba watbiâ anun anŋiâk. <sup>15</sup> Akto gasa aganŋetgât bo maktân. Dâ amâ yaiwâk aganbiâ biwiŋe purik kato gala aganbiâ ye olop manbeigât maktân.

### Den bâiŋe.

<sup>16</sup> O Galalupne, yengât Humonenŋe ulilanbe. Humonenŋe âmâ Lumbe Amboŋe wâtŋe aknengim biwinenŋe mem sândugemapŋe biwiyeŋe sândugeâkgât hokboâk hokboâk bikenba bikenba ikiŋe sândukŋe totokoyekto ârândân huragum yem âgâwiâp. Akto Humonenŋe ye olop manmâ âgâwei dâm ulilanđân.

<sup>17</sup> Galama, nâ Paulo, nâŋe luâk siâ maganđere yu kulemgoâp. Dâ den bikŋe ire nunak kulemgoân. Nânŋât bāt tirip ire ekmâ nânŋâm heŋgemgowei. Ire amâ Paulogât bāt tiripŋe hain nânŋâŋet. <sup>18</sup> Humonenŋe Yesu Kristoŋe ye hârok okot âlep akyenŋim damunyeŋe agâkgât ulilanman.